

## NAQQIUT

Siunnersuut 9. august 2018-imeersoq taarserpaa

### **Tunngavilersuut**

Inatsisissatut siunnersuummi 9. august 2018-imi nassiunneqaqqaartumi siunnersuutip qulequtaa aammalu siunnersuummi § 1-ip kalaallisuuani aammalu siunnersuutip danskisuuani imminnut naapertuutinngitsut paasineqarpoq.

Siunnersuutip qulequtaa kiisalu siunnersuummi § 1 kalaallisuuani danskisuuani imminnut naapertuuttunngortillugit iluarsineqarput.

**Kalaallit Nunaanni aalisarnermi pisarineqartut isumalluutininik atuinnermut akitsuutaat pillugit Inatsisartut inatsisaattut siunnersuut**  
(Aningaasaqarnermut Naalakkersuisoq)

### **Saqqummiussissut**

#### **Siullermeerinninneq**

Naalakkersuisut sinnerlugit matumuuna Kalaallit Nunaanni aalisarnermi pisarineqartut isumalluutininik atuinnermut akitsuutaat pillugit Inatsisartut inatsisaattut siunnersuut saqqummiuppara.

2017-ip ukiaani Kalaallit Nunatsinni aalisarnermut tamarmiusumut aalisarnermi pisarineqartut isumalluutininik atuinnermi akitsuusersueriaaseq nutaaq atulersinneqarpoq. Inuiaqatigiit isumalluutininik atuinnermi, isumalluutininik atuinnermi akitsuutit aqcutigalugit naapertuuttumik pissarsinissaannik qulakkeerinninnissaq kiisalu aqqissuussinermik ersarinnerusumik pisarinnerusumillu atuutilersitsinissaq siunnersuuteqarnermi siunertaavoq.

Akitsuusersueriaatsip ulloq 1. januar 2018 atuutilersup atulersinneqarnerata kingorna akitsuusersueriaatsit siunnersuutigineqartoq aalisagaqatigiit ilaannut nalitunerulersitsinermik annikillisisinnaallunilu, aalisakkat iluaqutigineqarnerannik annikillisisinnaasoq Naalakkersuisut paasivaat, tamannalu Inatsisartut inatsisaanni siunertarineqanngilaq.

Taamaalillunilu maanna akitsuusersueriaatsimi atuuttup ilusiligaanermigut aalisakkat ilaannut tunngatillugu, taamatullu pisut ilaanni, aalisagaq ilivitsuutillugu nunani allani pisisartunut

tuninera, kingornalu aalisakkap Kalaallit Nunatta avataani suliarinera imminut akilersinnaaneruvoq. Tamanna aalisakkat suliareriikkat tunineqarnerminni akisunerunerannik patsiseqarpoq.

Taamaammat periutsimi akitsuusiinermi toqqammavigineqartumi siusinnerusukkutulli suliareriikkap annertussusaatut pinnagu, tunisassianik kaaviiartitat 'aalisakkanut ilivitsunut' naatsorsoqqinneqartartussanngorlugu allanngortinneqarnissaa Naalakkersuisut siunnersuutigaa, taamaaliornikkut aalisakkap nalivia aallaaviunerulissalluni, tamannalu aamma akitsuutip annertussusaanik aalajangersaanermi malunniutissaaq.

Siunnersuutaaq aqputigalugu saattuat uiluiillu akitsuutaat norlumut aalajangiunneqassasoq sinnersuutigineqarpoq. Annertunngitsuinnarmik aalisarneqartut massakkut akitsuusersornissaata naapertuutinneginnera tamatumunnga tunuliaqutaavoq. Pisuussutini iluaquteqarnermi akitsuut nalinginnaasumit annertunerujussuarmik sinneqartoorutitut akitsuutaavoq, taamaalillunilu aalisarnermi iluanaarutisiat, aningaasartuutit, aningaasaliissutit piginnittunullu iluanaarutisiat naapertuuttut ilanngaatigineqareerneranni inuussutissarsiutitut allanut sanilliullugit annertunerujussuulluni. Tamannalu saattuarniarnermi uiluinniarnermilu atuuttutut oqaatigineqarsinnaanngilaq. Taamaalilluni akitsuummik attassiinnarneq naapertuussorinangilaq.

Naggasiullugu sinerissap qanittuani qaleralinniarnermi akitsuutip 5 procentimit 4 procentimut appartinneqarnissaa siunnersuutigineqarpoq, tamatumani sinerissap qanittuani aalisartut, aalisartutut tunisassiortutut pisaminnik suliarinninnermikkut nalittorsaanissamut periarfissaqannginnerat tunngavigineqarpoq. Tassunga tunngatillugu akitsuutit qaffasinnerpaaffissaat 17,5 procentimit 17,9 procentimut qaffanneqarnissaat siunnersuutigineqarpoq, tamatumalu nassatarisaanik aki suli qaffasinnerulerualuarpalluunniit akitsuut 17,9 procentimit qaffasinnerulissanngilaq.

Siunnersuutaaq inatsisip oqaasertaani erseqqissaassutini aamma imaqarpoq.

Naggasiullugu inatsisissatut siunnersuut tassungalugu nassuiaatit innersuussutigissavakka.

Taama oqaaseqarlunga Naalakkersuisut sinnerlugit siunnersuut Inatsisartunut suliassanngortippara.